

www.BibleForChildren.org


Génesis 3



Tsaypitanam warminpa shutinta
Adán churarqan Evata. Tsay shutita
churarqan payllapita llapan
runakunapis mirayänanpaq kaptinmi.



Dios Yaya Ilapan kamanqan
wätakunapitapis mas sabidum
culebraqa karqan. Tsaymi warmi
kaykanqanman witiykur nirqan:
<<ćRasunpaku Dios niyäshurqayki
mayqan jachapa wayuynintapis mana
mikuyänaykipaq?>>



Tsaynam warmi
nirqan: «Llapan
jachapa wayuyninta
mikuyänäpaqmi
niyämashqa. Peru huerta chawpinchö kaykaq
jachapa wayuyninpaqmi siqa albertiyämashqa
mana mikuyänäpaq ni yatayllapis mana
yatayänäpaq. Tsay
jachapa wayuyninta
mikurqa wañuyäshaqshi».



Tsaynam warmita
culebra nirqan:

<<Manam wañuyankitsu.

Tsay jachapa

wayuyninta mikuskirqa Diosnömi

musyayanki alli o mana alli kanqantapis.

Tsaymi Diosqa munantsu mikuyänaykita>>.



Tsaynö niptinmi tsay jachapa
wayuynin munapaypaqta rikar alläpa
munaparqan. Tsaymi allita o mana
allita musyayta munar jachapa
wayuyninta pallaskir mikuskirqan.
Tsaypitam ollqunta
makyaptin paypis
mikuskirqan.



Tsaynö mikuskirmi imayka
ñawinkuna kichakaqnö jina höra
tantiyakuskiyarqan qalapätulla
kaykäyanqanta. Tsaymi higus
jachapa rapranta jirarkur
penqayninkunata
tsapäkuyarqan.





Tsaymi Dios

Yaya qayarnin nirqan:

<<Adán, émaychötan kaykanki?>>

Tsaynam Adán nirqan: <<Taytay, huertachö puriykanqaykita tantiyaskirmi qalapätulla kar penqakurnin tsinkakushkä>>.





Tsaymi Dios

Yaya tapurqan: «¿Pitan
nishushkanki qalapätulla kaykanqaykita?
¿«Ama mikunkitsu» ningaq jachapa
wayuynintaku mikuskiruyki?»»



Adánnam nirqan: «Taytay, warmipaq kamanqayki warmi apamuptinmi tsay jachapa wayuyninta mikurqü». Tsaypitanam warmita Dios Yaya tapurqan: «¿Imatatan rurarquyki?»
Warminam nirqan: «Culebra engañamaptinmi tsay jachapa wayuyninta mikurqü».





Tsaymi Edén huertapita Dios Yaya
runata qarqurqan allpapita kamashqa
kar chakrachö arur kawananpaq.



Runata tsaynö

qarquskirnam rupay yarqamunan läduman
querubinkunata Dios Yaya churarqan
nina rupaykaq espädawan huertata
täpayänanpaq. Tsaymi
querubinkuna täpayarqan
imayyaqpis
kawatsikuq
jachaman pipis mana yaykunanpaq.




Tsaypitanam Adánwan Eva warmi ollquna takuyarqan.
Tsaynöpam Eva qeshyaq kaskir ollqu wawan yuriptin
nirqan: «Dios Yaya munaptinmi wawä yurishqa».



Tsaymi wawanpa shutin churarqan Caínta.
Tsaypitanam yapay ollqu wamrata qeshyakuskir
shutin churarqan Abelta. Abel jatunyarkurnam
üşhatawan cabrata wätakurqan y
wawqin Caínnam chakrachö
arukurqan.



Tsaypita juk tiempu päsaskiptinnam Caín llapan
cosëchanpita Dios Yayapaq qarayta aparqan.
Tsaynöllam Abelpis Dios Yayapaq
qarayta aparqan üshankunapa y
cabrankunapa punta yuriq
wawankunata.



Apanqanta pishtaskirmi wirankunata Dios Yayapaq waykarqan. Tsaytam Dios Yaya kushishqa chaskirqan. Peru Caín apañan qarayta mana chaskiptinmi alläpa rabyarnin jukläyapäkurqan.



Tsaypita juk junagnam Caínqa wawqin Abelta nirqan:
«Aku jallqapa pasyanapaq». Jallqaman
chaykurnam traicionarnin wawqin
Abelta wañuskatsirqan.



Tsaypitanam Dios Yaya Caínta tapurqan: «¿Maytan wawqiki Abel?» Tsaynö tapuptinnam nirqan: «Manam musyätsu. ¿Acäsu wawqi cuidaqku kä?» Taypitanam Dios Yayapa puntanpita Nod partiman täkuq Caín aywakurqan. Tsayqa karqan Edén huertaman rupay yarqamunan kaq läduchömi.



Tsaypitanam Adánpa warmin yapay ollqu wamrata qeshyakurqan. Yuriskiptinnam nirqan: «Wawä Abelta wawqin Caín wañutsishqa kaptinmi Dios Yaya munashqa paypa rantin juk wamrä kananpaq. Tsaymi paypa shutin kanqa Set».



Tsurin Set yuringanpita pusaq pachak (800) wata masraqmi Adán kawarqan. Paypaqa tsurinkuna ollqupis y warmipis kayarqanraqmi. Isqun pachak kimsa chunka (930) watayuq kaykarmi Adán wañukurqan.



Dios Yayam runakuna alläpa jutsata rurar
kawayanqanta rikarqan. Paykunam
shonqun munanqannö jutsata
rurananllapaq yarpäyaq.



Tsaymi runata kamanqanpita Dios Yaya alläpa päsakur nirqan: «¿Imapaqraq kay patsachö runata kamarqäpis? Kananqa llapan runakunatam ushakätsishaq. Tsaynöllam llapan wätakunata, lätaypa puriqkunata y päriqkunatapis



ushakätsishaq».



Peru Noétam siqa Dios Yaya Ilakiparqan.
Noépa tsurinkunam
kayarqan Sem, Cam y Jafet.



Runakunata kuyarmi japallan Tsurinta
Dios Yaya kachamurqan. Tsaymi
pipis payman creyikuq kaqkunaga
ushakäyanqatsu, sinöqa mana
ushakaq kawaytam
tariyanqa.



Romanos 3:23

Llapan runakuna jutsayuq karmi Dios Yayapa puntanman
chayta puëdiyantsu.

Romanos 6:23

Jutsa rurayqa wañuymanmi apamantsik. Peru
Señornintsik Jesucristo noqantsik rayku wañushqa
kaptinmi Dios Yaya dembaldilla salvamantsik puntanchö
imayyaqpis kawanapaq.

Hebreos 9:27

Tsaynöllam llapan runakunapis juk kutilla wañuyan y
tsaypitanam juzgashqa kayanqa.



Efesios 2:8,9

Dios Yaya llakipäkuq karmi Jesucristuman creyikushqa salvacionta qaramashkantsik. Manam kikintsikpitatsu ni allita ruranqantsikpitatsu salvacionta tarishkantsik, sinöqa Dios Yayapitam. Tsaymi ni pipis aläbakur ningatsu: «Allita ruranqäpitam Dios Yaya salvamashqa».

Romanos 10:9,10

Señornintsik Jesucristo mandashuqniki kanqanta nirqa y wañunqanpita Dios Yaya kawatsimunqanta llapan shonquykikunawan creyirqa salvashqam kayanki. Llapan shonquykiwan creyiyaptikiqa Dios Yayam perdonayäshunki. «Señor Jesucristuqa mandamaqnimi» niyaptikim Dios Yaya salvayäshunki.



Juan 3:16,17

Runakunata kuyarmi japallan Tsurinta Dios Yaya kachamurqan. Tsaymi pipis payman creyikuq kaqkunaga ushakayanqatsu, sinöqa mana ushakaq kawaytam tariyanqa. Manam runakunata infiernuman jitarpunanpaqtsu Dios Yaya Tsurinta kachamurqan, sinöqa payman creyikuyaptin salvananpaqmi.

1 Juan 5:11-13

Mana ushakaq kawayta qaramanqantsiktam Dios Yaya tantiyatsimashkantsik. Tsay kawaytaqa tarintsik Tsurin Jesucristuman creyikurmi. Dios Yayapa Tsurinman creyiq kaqqa mana ushakaq kawaytam tarin. Peru mana creyiq kaqmi siqa tsay kawayta taringatsu. Dios Yayapa Tsurinman confiakuyaptikim kay cartata apatsimü mana ushakaq kawayta tariyanqaykita musyayänaykipaq.



Génesis 3 - 6

Storyline by: Edward D. Hughes

Illustrated by: Byron Unger, Lazarus,
and Alastair Paterson

Adapted by: M. Maillot; Tammy S.

Quechua, Northern Conchucos Bible (qxn) © 2011,
Wycliffe Bible Translators, Inc. All rights reserved.

<https://www.bible.com/bible/268/GEN.1.QXN>

©2025 Bible for Children, Inc.

www.M1914.org

www.bibleforchildren.org

